

Minister Michelle Hooyboer-Winklaar durante ceremonia di instalacion

## Ta momento pa elogio y reconoce e trabao di Woman's Club



ORANJESTAD (AAN): Durante un evento special, Woman's Club of Aruba a instala nan directiva pa e aña fiscal nobo. Omaira Silvia a keda reeligi como Presidente di Woman's Club Aruba. E ceremonia a conta cu un cantidad di miembronan di e club di servicio y algun invitado, entre otro Minister

Michelle Hooyboer-Winklaar di Asuntonan Economico, Asuntonan Social y Cultura.

E mandatario a duna di conoce cu esaki tabata un momento hopi special manera tur aña unda ta mira e hende muhenan cu ta miembro di Woman's Club cu ta pone nan mes disponibel pa e trabao dificil cu nan tin cu

haci pa trece programanan na bienestar den nos comunidad. "Ta un momento pa gradici nan, duna nan elogio pa e trabao cu nan ta bay haci y pa esun cu nan ta haciendo pa varios aña caba", asina Minister Michelle Hooyboer-Winklaar a bisa.

E mandatario a subraya cu otro aña, WCA ta celebra



80 aña di servicio na nos comunidad. Tabata hopi special pa tende riba kico nan ta bay traha riba dje y kico ta e focus di WCA. Loke nan a scoge como tema tabata un tema di sapato pa demonstra e diferente tipo di sapatonan cu e hende muhe ta bisti constantemente y sigur e miembronan di WCA ki tipo di sapatonan nan ta bay bisti pa e ocasion aki.

"Tabata un momento hopi bunita y alegre. Nos ta desea nan hopi exito pa cu e trabao dilanti nan pa 2013-2014. Nos ta hopi agradecido pa e trabao cu nan ta haciendo den nos comunidad", asina e minister a agrega.

Omaira Silvia kende a wordo reeligi pa e periodo di 2013-2014 a bisa cu ta un honor p'e pa ta un biaha mas den e posicion aki. Te cu awor nan a eligi 60 presidente

y pesey ta un ocasion hopi special p'e. Ta un momento unico pa duna bek na nos comunidad.

Woman's Club of Aruba tin hopi proyecto y evento na caminda. Nan ta organisa diferente actividad pa esunnan den necesidad, pa nos grandinan, pa e muchanan, entre otro. Omaira Silvia a laga sa cu WCA ta habri pa mas boluntario. Nan ta spera cu mas dama den nos comunidad por join nan pa asina contribui mas activamente cu nos comunidad. Esunnan interesa por asisti na e reunionnan general caminda nan lo wordo introduci. Despues di esey lo por yena un aplicacion y asina bira miembro.

Woman's Club of Aruba lo ta hopi contento di por haya mas miembro pa asina haci e team uno mas fuerte, asina Omaira Silvia a enfatisa.